

27TH ASEAN-CHINA SUMMIT



Anwar bersama pemimpin ASEAN pada Sidang Kemuncak ASEAN-China ke-27 di Vientiane, semalam.

.(Foto BERNAMA)

Kestabilan di Laut China Selatan perlu terus dikekalkan

Malaysia gesa negara anggota segera muktamad Kod Tatalaku

Daripada Zanariah Abd Mutalib
zanariah_mutalib@bh.com.my

di Vientiane (Laos)

ASEAN semalam menegaskan kepentingan mengekalkan keamanan dan kestabilan di Laut China Selatan selaras dengan prinsip undang-undang antarabangsa yang diiktiraf secara universal, termasuk Konvensyen Undang-Undang Laut Pertubuhan Bangsa-Bangsa Bersatu (UNCLOS).
Ketegasan itu disuarakan Per-

dana Menteri, Datuk Seri Anwar Ibrahim ketika menyampaikan kenyataan bersama ASEAN pada Sidang Kemuncak ASEAN-China Ke-27 di Pusat Konvensyen Kebangsaan (NCC) di sini.

Pada masa sama, Perdana Menteri mewakili Malaysia sebagai penyelaras negara untuk hubungan dialog ASEAN-CHINA, berkata ASEAN juga menggesa Kod Tatalaku (COC) di Laut China Selatan dimuktamadkan secepat mungkin.

Sementara itu, Perdana Menteri berkata, ASEAN mengalu-alukan sokongan China dalam usaha peralihan tenaga dan menggalakkan kerjasama dalam teknologi baharu, seperti robotik dan kecerdasan buatan (AI)

"ASEAN mengalu-alukan Kenyataan Bersama Mengenai Memperkukuh Kerjasama dalam Pertukaran Antara Rakyat dan cadangan China untuk melanjutkan Tahun Pertukaran Antara Rakyat ASEAN-China hingga 2025," katanya.

Sementara itu, dalam hantaran di X mengenai sidang kemuncak itu, Perdana Menteri berkata, pada Sidang Kemuncak ASEAN-Korea Selatan Ke-25 bagi Memperingati Ulang Tahun Hubungan Dialog Ke-35, semalam Anwar berkata, ASEAN mahu memperkukuh kerjasama dengan Korea Selatan dan Jepun dalam bidang transformasi digital, selain sumber manusia dan rantaian bekalan.

Beliau berkata, Malaysia mengalu-alukan penubuhan Perkongsian Strategik Komprehensif ASEAN-Korea Selatan (CSP), yang dicadangkan Korea Selatan sebelum ini.

"ASEAN menggalakkan kerjasama dalam transformasi digital, termasuk pembangunan kapasiti, peningkatan kemahiran dan kepelbagaian strategik sumber manusia," katanya.

Pada sidang kemuncak itu, Korea Selatan diwakili Presiden-nya, Yoon Suk-yeol.

Pada masa sama, Perdana Menteri berkata, ASEAN menyokong penyatuan damai Semenanjung Korea, termasuk inisiatif yang diumumkan pada 15 Ogos lalu.

Suk-yeol sebelum ini melancarkan visi penyatuan dengan Korea Utara dan berjanji memperluas akses maklumat luar di negara tertutup itu dan mengusulkan saluran dialog rasmi yang dapat membincangkan sebarang isu.

Sementara itu, pada Sidang Kemuncak ASEAN-Jepun Ke-27, Perdana Menteri berkata, ASEAN turut menyeru kerjasama strategik antara blok serantau itu dengan negara Matahari Terbit dalam pengukuhan rantaian bekalan dan kemajuan kecerdasan buatan (AI).

Jepun diwakili Perdana Menternya, Shigeru Ishiba. Sidang Kemuncak ASEAN dengan Korea Selatan dan Jepun diadakan pada Sidang Kemuncak ASEAN ke-44 dan ke-45 serta Sidang Kemuncak Berkaitan di Pusat Konvensyen Kebangsaan di sini.